

甘泉鄉人稿

先府君詩文稿二十四卷咸豐甲寅刊於海  
昌廬舍庚申兵燹後板燬無存陳湘葵刻  
史錫麒為先府君門下士同治十年冬自直  
隸分俸寄助刻資曾文正師補撰墓表示  
於是年冬甫成遂以全稿重付手民惟曝  
書雜記三卷杜小舫方伯文瀾先於同治  
七年刻於蘇州茲即增列於後而卷目則  
仍其舊云十一年冬十二月應溥謹記

同治壬申叔父重刻 甘泉公集 以  
杜小舫方伯所刻曝書雜記 卷附入  
卷目與原本行款不類未臻完  
乙酉請於叔父仍依原稿重刻三卷而  
以杜刻為單行本並將 甘泉公自訂  
詩文餘稿弟作二卷敬校付梓九月上  
旬孫男志澄謹識於青溪官舍

甘泉鄉人稿咸豐甲寅初刻於海昌同  
治壬申重刻於白下承剗厠事者為赫  
陵陸工振聲今又陸工終始其事前後  
三十餘年中經兵燹三次開雕易其地  
不易其人殆與陸工結一重翰墨緣爾  
志澄附記

錢警石先生小像



世後學  
惲光業  
敬寫

耽悟易殆侈博易支先生有憂迷  
信不迢漢唐宋來學行文書揭其  
精華饁為饗鋪卅年校官講席以  
繼身在海隅氣鑄一世兵戈漂泊  
歸此靈光道山往矣緬邈長望

同治三年歲次甲子秋七月  
獨山年後學莫友芝述贊

海甯州訓導錢君墓表

君諱泰吉字輔宜號警石先世本何氏明洪武中有依海鹽錢翁鞠育者遂承錢姓厥後徙居嘉興代有聞人至文端公而益大文端公諱陳羣以侍郎

予告特加刑部尙書

晉贈太傅君曾祖也祖汝懋早卒本生祖汝恭安慶府同知父復大興縣知縣君少而苦學潛心孤往從兄曰儀吉者字衍石博通羣籍早有高名君事之師友之閒兄弟常以純儒相勉蓋自弱冠後遠近已盛稱嘉興錢氏二石云衍石以翰林改官戶部擢御史給事中久處

京師其後客游廣東汴梁君則以廩貢爲海甯州訓導者近三十年與給諫君離多合少而書問叢沓咨詢學術動逾數千言自周秦諸子馬班羣史許鄭詁訓杜馬典章洛閩之淵源唐宋名賢之詩古文辭以及目錄校讐金石書畫方志雜說一孔半枝無所不詢蓋亦無所不辨或獻一疑而詰難十返或尙論前哲評隲時流雜以嘲詼鄙諺窮極理趣故二石家書蔚然天下之至文也給諫晚而搜刻經說刊正訛謬君自中年卽好校古書假人善本及先輩評點之冊寫而註之眉端如史記前後漢書晉書集韻元文類禮記集說等編皆勘校數



周一字之外旁求眾證嘗箸曝書雜記以發其凡嘉慶  
中海內猶尙考據之說尊漢而黜宋先博覽而後躬行  
獨桐城姚氏鼎恪守程朱孤行不惑宗主義理不薄考  
據二石風指乃與姚氏相近其論文亦頗法姚氏嘗稱  
以爲字體故訓者漢儒之小學也曲禮少儀者宋儒之  
小學也二者皆扶植基本而宋重明倫於道爲尤尊兄  
弟相與修飭人紀誦述先德給諫輯廬江錢氏藝文略  
君則纂清芬世守錄皆表一門之懿行以播芳馨而詒  
典則先是文端公嘗進呈其母畫冊

高宗賜題十詩發還原冊并書清芬世守四字逮文端

公致仕還鄉

高宗寄賜冊卷詩篇累數千首君簞輯此錄具載君臣  
賡和曠古無倫又紀錢氏十餘世翰墨及名公鉅儒題  
詠上以著祖宗文獻之盛下以勸後人孝友於弗替其  
敘軼事述彝訓懇懇乎懼來葉之遺墮有味哉其言之  
也咸豐庚申辛酉之際粵賊縱橫浙中君展轉播遷最  
後由江西以達安慶國藩乃獲與相見以飄泊兵間儉  
得骨肉完聚也則爲之破顏一喜語及世事滄桑邱墓  
成毀不可知則又盡焉以悲其明歲同治二年十一月  
廿日卒於安慶旅舍將沒猶以先世文字之責未得及

身整理爲恨足以知其志之所存已君配胡氏

誥封恭人子二長炳森道光甲辰舉人出爲冢兄學源  
後前卒次應溥以拔貢官吏部主事軍機處行走加四  
品卿銜君以子貴

累封朝議大夫女六人孫七人孫女三人君所箸又有  
學職禾人考海昌備志甘泉鄉人稿亂後板燬僅有存  
者古今才智之士率思大有爲於世其立言常雄駿自  
喜若文章不求雄駿而但求平澹德業不求施於世而  
但求善於一身一家此殆非智者愉快事也具無所不  
能之才斂之又斂彌晦焉而彌愉快則其自得於中者

必大矣夫自得之學惟君其庶幾哉湘鄉曾國藩表

嘉興錢先生家傳

先生諱泰吉字輔宜自號警石先世本何居浙之海鹽甘泉鄉養於邑錢翁爲吳越武肅王十四世孫承錢氏數傳寢盛至先生曾王父贈太傅文端公益大顯王父汝慤早世以弟汝恭子嗣曰復官大興縣令者先生考也先生早敏學年十八補嘉興縣學生四年食廩餼又十年以數困鄉試援例爲校官及選海甯州學訓導年甫三十七也總角爲詩文卽縱橫馳騁受六經後好聚書簽排甲乙大興公顧而喜舉所藏書數千卷畀之大興公喪奉母沈太恭人扶歸伯父某試之詩文則喜又

舉所得語溪吳氏藏書數百卷悉予之且謂其從兄衍  
石曰善誘若弟自是先生日就衍石論學禾人稱曰錢  
氏二石自少至老兄弟摩切數十年弗少衰衍石者名  
儀吉以名進士官給事中海內所稱心壺先生者也先  
生旣高材躋場屋自樂校官不復就試肆力爲古文詞  
其要本於性情之眞養之以正不爲偏雜故氣和而體  
醇其精尤在牋疏考證自先世遺書外遇善本異籍非  
力所必不能得者悉購藏或假錄焉在海昌三十年及  
以子應溥封老將去又爲州人攀主書院數年有書數  
十匱大半丹鉛所勘訂於四庫名籍幾徧兩漢書元文

類尤精校者目爲曝書雜記兩卷百餘條自道所得成一家言海內學者及藏書家爭購傳之爲校官嚴身教正士習海人羣敬愛之大府計吏將以薦擢則力辭謝曰吾祖父皆久縣官實政在民吾故知縣令難爲也後其友馮柳東將辭校官爲縣令先生作書極尼之然於民生利病講權深至大府廉其才嘗以開濬備塘河事屬之先生舉民所不便者爲牧言斷斷往復辭不預開河事旣而牧乃大服於貞孝節義尤亟表揚勸修學宮集餘貲爲海昌備志成舉所得應旌義者節孝千數百人達於大府再三必得請而後已表鄉農朱興仁聘妻

張殉夫事旌於

朝及爲州張氏作適孫攝重議時人尤服儒者之教先生雖海壖司鐸耳而四方學人莫不聞其所著述期皆足以信今傳後於雜記備志外嘗輯家譜及清芬世守錄海昌學職禾人考詩文曰甘泉鄉人稿者卷二十有四咸豐壬寅海氛起在海昌日讀書不輟庚申粵賊陷杭乃辟海鹽匿跡深鄉常蘇疊陷及嘉興猶守先塋不忍去子應溥自京師亟馳歸乃請渡江行痛哭告墓至澈浦泛海息餘姚遷慈谿賊再圍杭破紹興慈之邨港火光徹宵復倉卒登海舶艤上海達九江時辛酉歲暮



矣明年應溥爲湘鄉相國招襄戎幕迎奉養於安慶於是先生老矣自遭寇亂頻年顛涉江烽海濤瀕洞之餘而神明迄未衰居則校讐經史猶日有程湘鄉幕府東南彥會所集先生至而樂之謂鄉中無有也癸亥十一月官軍復蘇州語應溥曰我其可歸守先隴乎時已病甚踰月乃卒年七十三子二長炳森道光甲辰舉人爲先生兄友泗後先卒次卽應溥以己酉選貢朝考用吏部小京官陞主事軍機處行走拯與應溥同直友善以先生年譜郵京師乞傳志弗可辭嗚呼我

朝監於明季學術之蔽國初大師實事求是蘄爲有用

比末流蔽又生求能飭學明先緒者蓋亦希矣拯於先生觀所著述歎其懃懃問學而見其大不遺其細抱其殘闕參互考訂而壹歸於本原孝友虛心實力以畢世而不移故樂敘其學行以爲之傳且與天下爲學人者同質論焉馬平王拯撰

警石弟文稿序

予少竊文譽鄉里中歲丙寅從弟警石奉大興公喪歸自京師年十有六英特而退謹又喜爲文辭郡人乃交稱之曰錢氏二石云於時世父戶部公老矣傷吾父行之先後薨落而望於後起也見弟則大喜命儀吉曰汝善啟誘若弟俾有成以慰我先人也嗚呼吾與弟不幸皆蚤歲而孤弟之伯兄學源先生德性粹然言動必以禮不意殤沒弟時尚幼而予幸蚤得奉教於先生稍窺爲學大旨後嘗舉以語弟弟益暱就予其後余雖在遠弟日月通書必陳所業而質疑焉至今三十年矣未之

有改也弟丁母憂執喪盡哀禮爲文述二親行事樸實  
悽愴族人見之皆感歎家貧節布糲置書數萬卷以讀  
雖甚煩困不廢治一書必貫首尾丹黃審勘數十過不  
厭斯其植性厚學力篤且專余固不能及已司訓海昌  
冷官日無事益得讀書遂不赴省試道光乙未弟寫所  
爲歌詩雜箸得卷十二寄予嶺南而曰自知其淺近不  
足爲文也病恕而存此乞兄有以進之幸甚予方北還  
行自念旅食奔走舊業蕪不治何以進吾弟雖然不可  
以已憶學源先生嘗問子弟他日欲居史傳何等耶則  
對曰文苑兄笑而若有愠曰弟何所見之細也夫人所

以希聖賢而蘄自得者非道德其曷歸耶今以予之荒  
情雖文辭亦且無成顧時念兄言不能不望之吾弟蓋  
嘗觀文人之雄秦漢以來雖門戶不一及其至也技巧  
變化皆不能無所止而惟道德之養人爲無窮也弟又  
多病時愈而閒作與其操筆以役心也不如體道而思  
默默而有不得已於言者必有異於今之所言者矣弟  
嘗慕梅子真之爲人誦言曰吾以讀書養性爲務然則  
文辭之所以不得已者弟自得之韓子曰道德之歸也  
有日矣文云乎哉道光十六年秋七月兄儀吉在大梁

書院撰序

增次稿目序

往歲甲午自次所爲詩文十二卷其明年衍石兄自大梁撰序示勸勵及歲癸卯又改定序文以寄以是益知文之不可以苟作也今距甲午又十五年矣凡所聞善言善行及有關政教之大端思欲論箸以示後人苦無學識以達其辭往往援筆而中輟而牽率酬應無用之言幾倍於前每自循覽顏變愧生輒欲焚稿親戚交遊謂尙無大悖於理乃與兒曹分寫爲文十六卷詩六卷自念行將六十學不加進姑次第之以俟增刪道光二十九年歲次己酉六月朔甘泉鄉人錢泰吉自識於海

昌學舍

深廬寤言序

往歲己酉自編所作詩若文二十二卷爲甘泉鄉人稿  
又次外編十二卷附著其目無用之言不忍棄置取笑  
同學宜矣今歲正月大病幾殆不自意得生乃取兩年  
來所作詩文雜箸屬女壻陳穎樓外孫沈伯彥各錄一  
編寄京師付炳森應溥兄弟一留小齋以自省覽詩  
文不類不次仿陸魯望叢書之體名曰深廬寤言亦魯  
望所謂夜分不睡則百端興懷攪人思益紛亂也然病  
夫微尙取法老友金岱峰將去臨安縣學時輯臨水芻

言之意仍欲就正有道若魯望自言遇事發作輒不舍  
忍則不敢也咸豐壬子二月五日嘉興錢泰吉識於可  
讀書齋時年六十有二



甘泉鄉人稿序

世人爲文必曰史漢之文不則曰唐宋大家爲詩必曰漢魏之詩不則曰李杜韓蘇殫其力以求其似其用心亦勞矣哉吾謂求文於文其得於文必不深求詩於詩其得於詩必不真詩文言吾所欲言而已言之淺深純駁則視乎其性情學術根於性也厚養於學也醇不得已而發爲言言必有係於人心世道所以不作於古人在是矣錢丈警石與余總角論交其爲人篤脩內行品誼端謹藹乎其可親沈酣古籍講求其是以去其非確乎其不可易官海昌訓導崇聖學端士習校讐古書日

有課程三十年如一日蓋素所蘊蓄者然也其少時所爲詩若文嘗出以示余余方治制舉業未能觀其深比余官京師奔走於四方則又簿書叢雜無暇以論古茲余罷官歸錢丈始出其文二十卷詩四卷問序於余余何以言錢丈之文之詩哉田閒野叟足不入五都之肆一旦游寶藏而曰我已盡識其名與其所產之地並其可以寶貴之故有是理哉雖然錢丈原本性情之厚學術之醇發爲文章予旣知之矣則卽謂已能名其寶知其所產之地所以可寶貴之故無不可也錢丈曾王父香樹太傅族父穉石少宗伯皆以文學顯名詩文集爲

天下圭臬從兄衍石給諫繼之冥心孤造卓然自名其  
家太傅與宗伯論文之札並給諫與錢丈往來譚藝之  
書大指必歸於敦孝友明義理有係乎人心世道而於  
古人流傳之作必深辨學術之醇醜性情之厚薄而不  
沾沾於格調辭句之閒於戲此益以知錢丈之文之詩  
異乎世之爲詩文者矣咸豐甲寅夏孟蓮溪沈濂謹識

甘泉鄉人稿目

卷一

與李曉村知州論濬河取土書

附跋

與馮柳東勸辭薦舉書

與宜興吳仲倫論文書

附來書

再與吳仲倫論文書

與金岱峰論祀孺悲書

卷二

與衍石兄述家世文字書

二十六通 附跋

卷三

適孫攝重議

劉向楊雄優劣論

書蕭相國世家後

書金淵集後

書黃陶庵先生鄉試卷後

書于襄勤年譜後

書何烈女傳後

書蓉莊沈君遺像後

書歙縣王君學愚傳後

書奉賢張氏義田碑記後

書西安鄭明經

文煊

上麓八詠詩後

讀蘇穎濱古今家誡序書後

書計母沈太安人墓表後

書楊節母鄭太孺人事實冊後

卷四

跋仿宋本朱子周易本義

跋鄒氏尚書蔡傳音釋

跋羣經音辨

跋古微書

跋類篇

二則

跋震澤王氏刻史記

三則

跋西漢會要

二則

跋東漢會要

跋曹棟亭刻隸續

二則

跋元翠巖精舍所刊蘇氏文類

跋元西湖書院所刊蘇氏文類

跋校本元文類

四則

跋明晉藩刻元文類

跋南宋文鑑序目

跋嘉靖海甯縣志

跋海昌都庄圖說

跋甬上范氏集古印譜

跋橫浦集

卷五

校史記雜識

校集韻跋

二則

附二跋

又附許跋

校佩觿字鑑跋

校陳后山集跋

二則

附錄三則

跋助字辨略

三則

跋章氏

宗源

隋書經籍志考證

跋舊刻鮑氏注戰國策

跋舊刻方輿紀要州域形勢說

跋惺齋雜著

儒林傳擬稿跋

文苑傳跋

卷六

跋書經集傳校本

附錄異文

跋評點書經

跋影寫元至正重刊蔡傳凡例

跋李金澗所藏洪範正論

并錄李跋

跋衛氏禮記集說



跋重刻撫州公使庫本禮記

跋仿岳本周禮

跋秦藩本史記

跋史記志疑

跋班馬字類 二則

跋舊本漢書

三則

跋通志二十略

跋梅會里李氏評校日知錄示炳森

跋文獻通考詳節示應溥

跋稽古錄校本

跋呂氏童蒙訓

跋離騷草木疏辨證

跋棠陰比事

跋蘇學士集校本

跋宛陵集 二則

跋司馬文正公集

跋劔南詩集 二則

跋宋文憲全集

跋歸震川集評本

跋徐俟齋居易堂集

二則

跋瀛奎律髓評本

三則

跋古文辭類纂

二則

跋強恕齋詩稿

二則

跋彭秋士集

跋歸安沈觀察

榮昌

成志堂集

卷七

曝書雜記上

五十七則

卷八

曝書雜記中

五十六則

附蔣跋管跋

卷九

曝書雜記下

四十四則

卷十

跋唐太宗草書屏風石刻

三則

跋李侍郎

宗瀚

重刻唐石廟堂碑殘字

跋舊拓千福寺多寶塔碑文

跋多寶塔碑題額

跋舊拓圭峰定慧禪師碑

跋隋仁壽元年岐州舍利塔下銘

跋唐化度寺海禪師墳記

跋唐顯慶四年桂州善興寺舍利石函記

跋唐韓寶才墓誌

跋周處士程先生墓誌

跋唐尚舍直長薛君夫人裴氏墓誌

跋唐韋端墓誌

跋唐龍花寺尼韋契義墓誌

跋唐宣州司功參軍魏邈墓誌

跋宋政和二年杭州鹽官縣社稷壇碑

跋紹興五年鹽官縣脩學記

跋開禧元年鹽官縣脩學記

跋宣和二年鹽官縣聽壁記

跋元加封孔子碑

跋元至正十九年海甯州安民碑

跋元至正海甯州題名碑

跋元至正二十一年海甯州脩城碑

二則

跋安國寺經幢

跋惠力寺經幢

跋宋紹興十一年賜崇祐廟額勅

跋安國寺宋理宗御書碑及碑陰

跋雙仁祠重刻米襄陽魯公仙跡記

跋元太平廣福寺碑

跋蘇文忠公鹽官絕句殘石

跋唐悟空禪師塔銘殘石

跋嘉定乙亥鹽官縣聽記

二則

卷十一

跋永甯二年甄文

跋雪庵八大人覺經石刻

跋渤海藏真未斷本二體千文

跋快雪堂帖

附錄彭文勤公二跋

跋秀餐軒帖

跋書譜

跋英光堂帖

六則

跋穎上黃庭蘭亭玉版十三行合裝冊

七則

跋明時翻刻聖教序

跋七里松張氏所藏楷海

跋趙文敏詩卷

跋新拓大觀帖

跋新拓孫過庭草書楊雄蜀都賦

跋西園雅集記朱典六摹刻本

跋楊孝直所集蘭亭

跋六舟縮本悟空禪師碑銘

跋宋版華嚴經

跋元刻蓮華經

自臨法帖及雜書跋

十七則

卷十二

書世系譜後

清芬世守錄跋

六世祖妣鄭太夫人補末傳跋

五世祖鶴庵府君墨蹟跋

五世祖鶴庵府君贈宛平相公詩畫冊跋

高祖廉江府君遺詩跋

直廬問寢圖跋

附圖後記

文端公自錄詩卷跋

文端公錄耕織圖詩跋

三則

文端公永慶大橋碑記跋

文端公募脩永慶橋南關帝廟引跋

文端公臨趙書衛生歌跋

文端公所藏玉枕蘭亭拓本跋

二則

本生祖考安慶府君錄朱子訓學齋規黃陶庵先生

自監錄跋

二則

從祖肖巖先生灌園詩草書後



先府君詩文手稿跋

先府君芝城八景詩書後

先府君隨筆書後

先府君與祝蓉渚丈札稿書後

舅氏沈味蔗先生錄先宜人詩書後

族父毅齋先生閩山連騎圖跋書後

元跋錄前

叔父贈侍講公陝甘鄉試閱卷簿跋

清安老人錄呻吟語跋

翼堂兄詩集跋

附記二則

自浙之滇山川行程圖跋

跋几山文學

善揚

畫蘭

跋冷齋勘書圖

卷十三

查近川先生覺庵存稿跋

讀祝虛齋先生嘉議堂集雜識

六則

讀許同生先生遺稿雜識

三則

跋陽明山人和董蘿石詩卷

跋張方洲朱西村兩先生詩畫卷

跋黃葉村莊種菜詩卷

潘太史瀟碧亭圖跋

葛素如廣文

星垣

刻曲授經圖跋

陶棣生齋尹

宗輝

靜觀圖跋

爲金岱峰跋桂未谷隸書屏幅

秀水周氏竺橋丙舍圖跋

陸贄香曝書圖跋

雍氏補荆圖跋

讀徵賢堂集雜識

海昌重脩學官存信錄跋

節孝錄跋

卷十四

記沈氏

嗣選

南宋文鑑目

記兩漢書校本

記第六世族祖蓬州公鄉試卷

石門縣重建傳貽書院記

代盧翰坡大令

海甯州城河記

代王百期知州

卷十五

海甯州知州陽湖惲侯政績記

重建觀音橋記

記周氏孝子

記曹文學葬兄事

記沈林

記介休獄

半弓園記

遜齋記

待雪樓記

篝燈教讀圖記

紡燈課讀圖記

文端公遺印記

冷齋勘書圖記

海昌學宮所藏元代祭器圖記

二則

茗山訪碑記

彭墩陸氏義門記

記瑞安項氏二孺人事

笠湖詩老生壙記

卷十六

勞杭叔

頌

訂補續漢書藝文志序

新刻拜經樓題跋記序

海昌學職禾人考前後序

管文學

庭芬

淳溪舊聞序

祝南筠

德興

延緣草堂詩存序

朱吉雨

聲希

詞稿序

屠筱園教授

湘之

遺稿序

項叔明

霽

詩序

忽逢林唱和詩小序

沈蓮溪

濂

時文序

彭墩陸氏譜序

桐鄉沈君

基

雪山誌感圖序

送前東海防同知呂公

榮

歸陽湖序

張荔園教授駿九十序 餘姚蔣芳塍壽序

錢菊豪清蓮七十序 陸芝塘用霖八十序

舒自庵觀察化民七十序

世母金恭人七十序 贈吳少尹肇堂序

贈葛文學謙序 贈徐韻生孝廉維城序

贈周文學光熊序 贈周次軒士清序

卷十七

藏書述 述訓二則

先母沈宜人遺硯銘

先兄學源先生遺硯銘并序

特齋先生遺硯爲蔣寅昉銘

濟南行篋硯銘

寫詩經硯銘

嘉慶庚辰脩家譜硯銘

宋坡湖漁者硯銘

并序

校三史硯銘

海昌志館硯銘

深廬肄書硯銘

并序

蝙蝠硯銘

宋歙州水絃坑金文硯銘

并序

竹節端硯銘付應溥

渤海師相硯銘

竹筆筒銘

印匣銘

印匣銘付炳森

印匣銘付應溥

漢永平元年甄硯銘爲李竹君

承湛作

曹杏庭

錦堂

硯銘

管芷湘

庭芬

斷硯銘

朱砂端硯銘爲沈問齋

炳垣

壽

元豐己未澄泥硯銘

并序

太公像贊

并序

李介石先生不可一日無此君圖贊

并序

題海昌陳節母小像

海昌脩志開館條約

乙巳正月

海昌備志發凡

丁未四月

卷十八

先祖考妣行述

先考蓉裳府君行述



先妣沈宜人行述

文端公遺事

十九則

先府君遺事

五則

卷十九

張北湖先生事狀

孝廉方正李先生行狀

湯溪縣學教諭沈君行狀

胡藹人家傳

陸繹亭家傳

秀水二張孝子傳

蔣節母徐安人傳

朱節婦張氏傳

張節婦王氏傳

郭烈婦傳

朱節母傳

楊丐婦傳

卷二十

順天文安縣主簿程君暨配錢孺人權厝志

封奉直大夫長沙李翁墓誌銘

四川榮昌縣知縣龍府君墓誌銘

特齋先生墓表

四川彭山縣知縣錢君墓表

桐城吳君夫人權厝誌

長沙李母黃宜人墓誌銘

烈女張珊姑墓表

附錄碑陰

祭姑夫蒯鐵崖先生文

祭蔣母錢安人文

卷二十一

讀舊書室古今體詩

卷二十二

可讀書齋古今體詩上

卷二十三

可讀書齋古今體詩中

卷二十四

可讀書齋古今體詩下

甘泉鄉人稿卷一

嘉興錢泰吉輔宜

與李曉村知州論濬河取土書

泰吉竊祿於此九年矣謹守先人之訓不敢妄言動以自取戾職處閒冷不當有所建白未嘗以事干大府也客冬觀察金公假之顏色以事下問謹據所聞以對亦未嘗求知於觀察也觀察鑒其誠遂以公舉董事開濬備塘河見屬自揣庸下不克勝任訪於土人議列條款大指疏通河道以洩海塘漫溢之水因仍地勢以免閘閘滋擾之弊蓋保民必先安民安民必使樂業也及執

事下車首以此事相詢亦既不鄙其言許參末議矣今聞大府俯念民依欲取土填補塘足水坑使金堤鞏固永無漂盪之患甚盛意也嘉松諸郡生靈皆在大府懷保中豈獨海昌一州之民歌頌而已哉又豈得以州治一隅之民小有窒礙而妄議石畫哉然伏處下風竊聞輿論有不得不爲執事告者側聞下尺一之符稽魚鱗之冊鐫廣河身盡反侵地夫沿河居民因河道填闕貪愛小利樹藝其地幾同世業今將固其隄防俾安百室而執姑息之愛動以勿擾爲言此迂闊之論誠不足與圖實政然頻年歉收民處重困之後婦子纖悉之利私

之日久得無有稍宜紓緩者乎古人謂寬一分則百姓受一分之福者此類是也然此猶得曰侵占官地律有明禁貸其既往之咎與謀遠大之計民亦俛首無辭耳若濬河之土不足填坑將別買民田以爲補益則其事有未易一二言者往者取沿塘之土興建柴埽此數世之利也而下流竊議何可盡聞茲事重大非鄙儒所敢言今執事議以浮面膏腴還之業戶而取其下瘠壤此執事重農意也然稻田之土本欲推陳出新縱畱面土無補於民而近塘之地半屬桑田辛苦樹藝十年乃成旦晚護視無異金玉欲取其壤不能不拔起桑本拔而

後裁執必不活是執事雖有愛民之心民未必實蒙其利執事又謂取土限以尺寸不許過深使其地仍可耕種用意良美矣但恐從事畚揭者未必人人能實體愛民之心儻所取過限小民豈敢力爭況按畝而計取土既屬有限給價不能過制糧賦不能蠲除是民坐失數年之利而有數年之累也若此事既行執事雖憐而撫之已無及矣此泰吉所以急欲爲斯民乞憐也夫大工既不容已備塘河之土又不足填補水坑然則將奈之何鄙意不若於備塘河旁近相度淤塞河道有宜疏濬者籌畫施功卽離塘稍遠以買土之價爲運土之資彼

此相準雖所費較增而小民獲水旱之備沃壤無曠廢之患農業不失大工速成亦兩得之道也執事儻不以爲迂言祈與在事諸公熟籌之昨於廣坐之中略陳端緒訥于口辨不能盡言用敢以筆代舌煩瀆清聽先民有言詢於芻蕘管窺之見不知有當芻蕘否伏惟恕其狂愚一畱覽焉

此稿成質之主其事者謂事有窒礙不可行遂不錄與李侯因辭開河事不與聞書中之言固嘗告之李侯者也故此稿亦不毀以俟他日自思之而知所言之失當則予之學亦進矣乙未十二月上浣警石記



警石成此書幾二年矣今始獲見之書中所言未始  
非曷意也沿塘民占官地大府欲盡反之曷爲力爭  
事遂寢僅就所填坑窪畫爲官地耳若買民地作埽  
工乃大府久經入告 允行其培塘續買民地十

餘畝亦已歸入奏案豁除糧額矣書中於民生水利  
反復言之仁愛之心溢於簡外警石之抱負宏通品  
詣卓絕胥於是乎見至文筆清超拔俗尤有令人把  
玩不舍者曷與警石初議此事頗不合讀是書心若  
有相印者書此以志余愧丁酉暮春長沙李象昇識

與馮柳東勸辭薦舉書

逾年不奉書深以爲念昨宜興吳仲倫丈自四明歸迂道見訪談三日詩古文及書法皆卓然獨到不愧老宿惟詩境過高未能卽從吳丈謂柳東言亦如此且盛稱柳東近著古文得桐城正脈爲之不已必傳於後此柳東數年來鱸堂寂寞中獨造之詣然則天之位置柳東而成就之者爲不薄矣假使柳東不辭將樂令今雖由縣令而郡佐而郡守而監司卽超擢而開府榮則榮矣其自得之樂恐不若石經閣詩古文之確然可傳爲身名俱泰也昔王朱賢先生亦嘗爲將樂令數月罷歸境甚困爲書院長終其身集中文字及諸所撰著則自罷

官後而大成今遂以祗平居士況柳東柳東之志則遠矣然而鄉先輩前事之師可念也比聞柳東膺大府之薦將舍校官而再爲縣令柳東果樂於縣令乎不當去將樂而遄歸矣柳東果不樂於縣令乎何聞大府之薦而不辭也與柳東同舉進士登館選者今爲開府監司踵相接柳東宜不能無動於中然命也非人之所能爲也假使柳東不辭縣令遂能偕數公者比肩疊迹而致通顯乎此固不足爲柳東重而爲柳東計則有甚不宜於縣令者敢陳其愚願一察焉牧民之官當耐繁雜乃有實政及民吾曹與卷軸同臥起家人呈日用簿纔十

百字猶懶不寓目一旦爲縣令文書堆案能如歐陽子之徧閱夷陵舊牘乎其不宜一理財用人當官之急務不善爲之則飽豪僕之橐貲子孫之憂柳東度理素精當不至此然未敢爲柳東決其必不至此也其不宜二柳東爲古文求直接震川則震川者柳東之師也震川爲長興令爲忌者所中卒不得顯仕蓋不同乎流俗必爲流俗所駭怪柳東能與流俗之爲縣令者參錯其閒無所齟齬否不能無所齟齬而欲其折服柳東之學之才而惟柳東所爲能乎否況大府而愛重文學士未易數數覲卽愛重矣因文學而不責以吏治斷有所不能

柳東自揣吏治果勝於文學乎否乎其不宜三柳東有老親校官雖未足榮其親然絜白之養甘於五鼎膺薦而補縣令當在數年後又不能在任候選未得一官之遷先失三釜之祿非計也他日就銓雖例得告近欲如甬東之能安輿就養朝夕承歡亦未可必吾恐柳東望雲之思太孺人倚閭之嘆自此始矣其不宜四凡此數者柳東宜自知之而決然膺薦而不辭其義當別有在然竊念柳東道義之友總角之交若張蓮舟堯民兄弟李次白史竹南屠梅西周桐北諸君子無一存者新得文字之好如吳丈者亦知柳東不宜再爲縣令而以交

淺言深爲戒未嘗爲柳東言其他或不能無利於柳東  
爲縣令而不欲言其淺者又未暇爲柳東深謀而不能  
言泰吉齒雖少於柳東託交柳東幾三十年學問不逮  
柳東遠甚世事則粗識一二且先祖父皆久任縣令家  
庭傳述極知縣令之難爲若不爲柳東言恐無人爲柳  
東言者敢布腹心望深思之倘大府之薦必不可辭縣  
令之職決所樂就亦望柳東深思之苟泰吉所謂不宜  
者皆深思之而得其宜則柳東之由縣令而超擢而開  
府必無不宜矣幸甚幸甚吳丈言柳東十八日自四明  
開棹日內當在武林泰吉無事至武林柳東能一來敝

齋作數日談出處之計當更決矣專此布意不宣丙申  
四月二十八日泰吉頓首

與宜興吳仲倫論文書

束髮卽耳盛名嗣於莊芝階翁處讀尊著益深向往  
前年得見先生已爲平生之幸先生許以便道見訪更  
歷兩載必踐斯言乃知先生出語矜重則文字之不苟  
益可想見泰吉小時讀先世遺集受教於從兄衍石因  
而推之當世之作者略窺詩文門徑大抵見地之淺  
深各隨其學問所到不可勉強而其尤要者真僞之  
辨也自古作者必有性情獨到之處資其性情所獨  
到而養之

以至正不至於偏且雜其氣和以平其體醇而雅而充之以經史之義蘊其言爲天下之至言其文爲一家之眞文在上而操簡畢足以紀朝廷之實政而不誣伏處一鄉則一鄉之嘉言善行及其足跡所至耳目所及亦必辨別人材之高下義理之經權審慎而書之雖傳之十百世而其言之信否知言者必能辨之此古人所以甚有所戒懼而不敢輕肆其言也若夫筆勢之起滅變化敘事之錯綜離合固文章之能事而其本猶不在是世傳先生得桐城正脈所爲文甚似惜抱泰吉謂先生妙處正在不似惜抱蓋論其大同則文章之理脈萬變



不殊惜抱不能不同乎海峰海峰不能不同乎望溪望溪又豈能變滅唐宋以來諸大家之規矩而自爲一規矩哉若其精神獨至處雖父子兄弟不容相假老泉之廉悍東坡之明達子由之沈靜各根乎性情不可強也惜抱豈能苟同乎海峰海峰豈能苟同乎望溪先生又豈肯摹擬惜抱之形似以苟同乎惜抱哉泰吉得侍三日微窺先生性情之眞旬日來細讀大集及聞見錄知先生用心之所在將與古道德者爲徒能使一時之賢人逸士與夫孝弟節烈之至行下及一技一能之微皆賴先生以傳而僞雜之念矜肆之氣自其少時驅除殆

盡大雲山房謂爲才弱者在此先生勝於大雲山房亦  
在此惜乎皋文先生早世不得與先生久逐乎壇坫而  
商訂其異同也然先生與茗柯必並傳於後無疑茗柯  
以密栗勝先生以蕭疎勝要之用心之平正真實而和  
藹之氣充溢於楮墨間是則先生一家之真文也泰吉  
何足以言文學淺而體弱其無成也必矣然性情不敢  
不養也眞僞不敢不辨也平生微尙如是而已嘗與友  
人縱談謂偶有所作惟冀傳示家之子弟爾平居之動  
作外人或可欺家之子弟不可欺也無使他日腹誹而  
竊議曰某翁所言與所行殊不相似則亦幸矣假使子

弟不信其言又安論外人耶泰吉所自勵者如此惟先生教正之附呈與柳東書一通乞賜刪削柳東已早辭薦舉不藉鄙人之言泰吉借柳東以舒寫其性情亦良友之助也台從何日南來得再侍談幸甚幸甚潘梧君手啟並呈暇望披答暑候諸惟以道自衛不勝仰企丙申五月廿六日泰吉頓首

附來書

警石先生執事前奉手教知道履綏和爲慰德旋受古文法於張編修姚刑部而自爲之文不敢外襲其貌則有之若來書過推之語非所敢承也夫綴文之

士孰不以千載自期然吾第能爲其可傳而已不能  
必其傳也且惟求以自信而已其傳與否蓋有天焉  
而豈吾之所能自主哉古人之文之傳於今者多矣  
不能盡善也以不善者之幸而傳則其善者之或有  
不幸而不傳可知也執事之文淵源甚正而又虛心  
樂善如此異時之造詣豈德旋所能測量耶與柳東  
書何言之沈痛快切乃爾朋友道喪久矣而執事能  
盡言於柳東柳東能受盡言於執事並爲居今之世  
之所希覲敬服敬服答梧君書附去希便致之謹此  
奉答不宣八月初八日德旋頓首

再與吳仲倫論文書

秋冬之交莊芝階丈遞到手教伏審動定多勝以欣以慰相去數百里牽於寸廩不得一訪高齋先生亦未知何日來遊得奉尺書如獲繼見幸甚幸甚今年冬寒氣殊甚十餘日來幾不能把筆南檐兀坐咀嚼先生冰雪之文乃知冷淡閒遠中自有妙境彼赫赫者炙手可熱如夏日之日蠹蟲嚙膚揮汗不輟欲求清風冷然沁其肌骨豈可得哉若文之傳不傳雖有天焉亦存乎人之自命何如耳苟不可泯滅則雖或毀之譽之傳習之廢棄之而作者之精氣凝結常在天壤間不足爲重輕也

若譁囂之玩紙墨幸存形神早敝與其枯朽之骨同埋  
糞壤而已矣二百年來大江南北詩古文詞見於著錄  
者不知凡幾先生視之若者傳若者不傳自有定論不  
毫髮爽幸而傳者雖傳何益不幸而不傳後有作者想  
聞於聲名闕寂之餘收拾叢殘大行於世古人遺集如  
此比者亦匪一家要其操紙下筆時自有不可磨滅者  
故雖蟲蝕塵埋終久不敝也然則文章之士思自樹立  
者亦盡其在我以俟夫天而已何暇計其傳與不傳閔  
閔焉懷千歲之憂哉先生嘆賞彭秋士文簡質如陳承  
祚不知可得一讀否梧君求梅厓居士文苦不可得昨

得之急走相告海隅索處有此同志之士竊幸我道不孤矣先生續集如已刊成望卽惠寄亦梧君所日夜想望者也周觀察調任臺灣先生未必遠游江淮近地有好事者相從訪道否鍾茂才歸望詳示近狀以慰懸企

與金岱峰論祀孺悲書

臨安久無尊經閣吾兄旣重建應奎樓又倡議創造克觀厥成欲用謝山全氏之議祀傳經先儒甚盛舉也謝山之議詳美矣然尙有未安者尊經閣之祀雖較兩廡有閒然非私家建置不敢執一人之說遂定祀典也已承命商之衍石家兄俟其答書卽當奉達兄欲祀孺悲

其議發於竹垞翁謂論語記孺悲欲見而孔子辭以疾後人疑孔子拒之門牆之外遂以親受禮於孔子之儒不得與配食之列是說也泰吉竊有疑焉敢陳左右悲之欲見而辭疾不知孔子之意何居皇侃論語疏謂欲見孔子爲召孔子不知其言所受朱子謂學禮時得罪竹垞翁則謂始雖辭疾終授以禮皆爲揣測之辭當日情事究未知其何若孺悲果能發其蒙而崇道歸聖若李充之論乎抑終無自新之塗遂挫之而絕之乎然悲之宜祀不宜祀亦不在夫子之終絕與不終絕也尊經之祀意在傳經果爲禮家一大師則雖若後儒之實有



疵類猶將置其生平之議錄其傳經之功況孺悲者未  
由知夫子不見之故則其人之賢否未可知因疑似之  
文蔽經師之罪敢乎哉蓋嘗繹雜記之文而知悲學禮  
之功固不可沒若遂許爲孔門傳禮之儒則推崇之過  
矣記曰恤由之喪哀公使孺悲之孔子學士喪禮然則  
悲特受命於哀公而來爾哀公屢問禮於夫子戴記所  
傳大昏等篇皆由哀公發之使悲來學又得傳士喪禮  
則傳禮之功當歸諸哀公悲特銜命之使人如朝錯因  
孝文之詔往受伏生尙書而世傳尙書學者不聞朝氏  
得比於歐陽大小夏侯也鄭君釋士喪禮於是乎書之

文謂孔子以教孺悲國人乃更書而存之疏家無箋釋  
注義竊謂鄭君之意亦不過謂國人見哀公之好禮轉  
相效慕乃卽孺悲所受教者書而存之而未嘗必謂孺  
悲爲傳禮之師也況士喪禮具載儀禮自來言禮家傳  
授源流者皆不及孺悲未可與受易之商子木並不過  
一時承命而來則亦不得與學禮之仲孫氏同居弟子  
之列也而遂以冠尊經之祀竊以爲未安矣竹垞翁謂  
明人議黜崇祀諸儒爲夫姿刻薄泰吉豈敢犯此不韙  
之名因兄高議遂發狂言望與筱園商之并賜裁答餘  
詳別紙不盡丁酉五月二十六日泰吉頓首

岱峰言賈氏儀禮士相見禮疏謂孺悲欲見孔子不由紹介故孔子辭以疾似於當時情事爲得其實頃讀潛研堂答問亦用賈氏說七月十三日記

甘泉鄉人稿卷二

嘉興錢泰吉輔宜

與衍石兄述家世文字書

中丞叔父命纂修家譜此重任也何以克勝然數十年來先人所欲爲而未遂者若不乘此時殫心竭力以冀一成其何以副先人之意謹條列管見折中於吾兄惟詳示焉

一舊譜以貴四何府君爲第一世祖按吾錢之爲錢也自如淵府君始變姓爲始祖晉人曾有是言則似宜推如淵府君爲一世貴四府君則吾始祖所自出也然舊

譜以貴四公爲第一世相沿已久一旦遽改情有未安  
若便遵依則錢氏之譜而以何貴四府君爲第一世恐  
非貴四府君之意前與味根議依萬氏譜式首行本生  
何貴四府君恩撫錢富一府君並列不入世數一世則  
如淵府君於譜例似少合昨味根言本生者爲人後者  
之稱吾先世自臨江公以來嘗議還何姓則先人之意  
未忍以貴四府君爲本生也語亦甚當祈裁定曾刻一印曰海  
鹽何承錢姓第十四世昨偶思之不可用也云何承錢  
姓則世數必自如淵府君始今云十四世則並數貴四  
府君爲承  
錢姓矣

一隋書經籍志著錄家傳家書今無存者體例若何末

由攷見近世撰譜則凡一人之行狀墓誌小傳必兼錄焉此亦爲子孫者不忍刪棄其顯揚先祖之文立意甚厚然一人數篇則語多複見而又不能俱出於名手讀未終篇便覺繁雜者亦往往而有今必一一登錄乎抑擇一篇最詳核典重者全錄其文其有見於他文而此文未及者節錄數條注明某人所撰某文附於前篇之後或分注篇中未識可否鄙意若吾兄排比舊文纂成家傳則體既畫一舊時所有行狀墓誌等文別編一集可也尊意以爲然否

一譜目擬首

宸翰次

誥敕次世系表次傳誌次墓域次祠宇

祭田附

次義田

次雜錄

贍軍田香鑪記等類凡有關於錢氏掌故而無所附麗者皆入焉

而以舊譜敘

錄終焉

一世系墓圖義田祭田等項弟與在南諸君子查辦傳誌等項則須吾兄擇定與味根參酌之定本寄南以付開雕但查辦世系等項必徵舊文世系欲免冒漏須核舊譜及先世狀誌南中惟有萬厯丙申刻家史及行可所鈔之譜鈔譜有未審處家史則僅有魯南府君以上之文弟意吾兄處所有先世舊譜除萬厯譜外康熙年

所刻譜二冊卽覓便寄來餘則陸續鈔寄至要至要  
右四條據一時所見錄商餘俟續陳弟擬於元宵後下  
鄉先查訪第一支第一支難查之至本支無人可託旁  
支則不甚了了俟有頭緒再行奉報聞英姪云吾兄曾  
纂錢氏小譜未識合族俱及抑僅詳本支若纂入家譜  
亦創前人所未有甚妙甚妙望鈔寄爲快  
嘉慶庚辰正  
月初七日寄京

弟於正月二十六日下鄉先至齊家橋託簡華叔輯孟  
先公若庵公以下譜稿萃安叔輯一庵公以下譜稿遂  
約虛白兄黼璜姪孫同至海鹽見敦甫叔知蘅石少宗



伯公曾屬繼畬先生鈔譜於乾隆四十九年寫成其稿  
恬齋處必有之味根知之否以臨江公支下託敦甫叔  
及孔彰叔次日見謝庭叔於南錢則底稿已鈔大半矣  
遂專託謝庭叔此二十七日二十八日事也二十八日  
清晨至曲尺街見大支從姪學秉樹聲兄之子樹聲兄名彪炳現游幕於直隸  
從弟玉峰考訂兩房先世生卒兩人皆筠汀公後人  
所居有學誠齋額竹影去來三徑石香煙繚繞五車書  
楹帖皆鶴庵府君書楹帖署辛巳孟冬又藏陳太夫人  
畫太士像立幅長約二尺款云吳母姪孫女愛余墨筆  
殊甚敬圖大士供頂禮時辛卯六月之望上元弟子陳

氏某學誠齋之右有蘭雪二字額是文端公題飯後至  
總捕衙乃學秉之從祖號京觀所居京觀我叔也在塤  
城煙店內遂回舟至塤城見京叔已申刻矣傍晚至孟  
家堰見名大經大綬光滂三兄皆西溪公裔孫遂託輯  
西溪公支下譜晚飯後至南錢見謝庭叔邦榮兄新遷居南  
錢是晚宿於中錢舟中二十九日早至港南魯周兄處  
筇下午飯後拉黼璜同至甘柯頭訪大支族眾有季善  
者號心元我從姪也年七十餘矣眾口一詞以爲可託  
遂邀其同至各房查寫晚回中錢二月初一日仍同黼  
璜至甘柯頭補寫至日中而畢筇汀支下十得六七矣

遂拉季善及其弟奉莪同至沈蕩鎮訪筠汀支下之分  
居者筠汀支下十得八九矣弟以家中有事欲歸遂託  
黼璜補其未備者及芝山西汀兩房之分居蓀莊等處  
者是行也第三支得分任之人第一支頭緒略清而第  
二支第四支竟無查攷奈何奈何此時所切望者吾兄  
卽定編次譜稿體例寄知耳前日讀魏季子集有修譜  
凡例吾兄或參用焉 庚辰二月

太常公年譜謹寫清稿遲日當寫一本奉寄求細細指  
示核定他日或可附刊集後顯忠祠建於何年讀碑記  
似在紫芝府君時何以海鹽續圖經及新修府志祠祀

門俱未載

府志中有缺葉或在缺葉中

志書之疎略亦不足怪也褒

忠錄弟所見惟一冊不分卷僅有祭文藝文略云五卷想必有足本便望一查家譜一年內必須纂成體例究竟若何所需文字望卽鈔寄

道光辛巳

前接詩箋及滄嶼先生張方洲讀史錄序展誦之餘欣忭無量 四庫提要載方洲集爲我紫芝公刻本並有募刻疏今所得者有先公文否現所編輯之譜例不收先世爲他人撰著之文滄嶼先生文當增入文匯中或附於傳誌之後俟酌定可也蒙示讀永州公集知樸庵府君爲朱碩人出當謹著於世系表中凡今所考增者

皆著所自弟亦曾見及似宜仿水經注例於注中加注  
吾兄以爲然否或於每表之末附著攷證若大宗戍黔  
之在洪武二十三年則附錄吾兄所撰錢氏小譜中辨  
證一條於一世至五世卷末未識是否譜之有外傳宛  
平王氏亦然見梅村文集彼蓋專記女子子適人者故  
梅村云問我諸姑遂及伯姊也與馮氏譜又小異吾兄  
蒐佚舉墜爲前人補所未及妙甚妙甚弟前假得晚香  
先生手鈔冊有數葉可備外傳考證謹錄奉覽家訓能  
卽纂集爲妙大約宜先摘錄先世文集次以傳誌文字  
似較外傳爲易奏功大著廬江小譜亦望早爲編次刻

入譜中亦創例也曩所商譜例昨夏曾札商於恬齋  
使回札云熟思致答東堂叔見弟致恬齋札中論

誥敕一條以爲不可少少宗伯公譜例亦有分紀各膺  
榮命之名之氏之帙用勸後人語則亦以爲不可闕今  
擬敬錄

天章一卷

誥敕一卷

恩賜祭葬文一卷以冠全譜但

誥敕纂集極難前曾言之又明代誥敕如何附麗祈詳  
審示知爲禱先世文字及大稿中宜載入家譜文字求

遇便卽寄讀先世文字亦頗不易卽如臨江公錢何同  
姓考中述得姓之源未知本於何書擬鈔此文及承啟  
堂稿中何氏復姓問答冠於先世傳誌文字之首不知  
可否此外欲求指示者不少續當條列請教 壬午二月  
二十七日

紫芝府君瀄風會約一篇附去文匯目望寄來清士詩  
亦欲一鈔聞新鄉縣新修安慶府君祠堂碑記甚佳求  
寄一通並吾兄所撰新鄉詩卽寄爲妙恬齋暢談數次  
頗得聞所未聞紫雲先生遺稿已借鈔稚真女史爲於  
潛公元孫女而未知爲何人之女譜中亦無不知吾兄

所藏遺稿尙可得其自出乎前得陳山鶴先生廷琛思  
儼齋文鈔有錢太恭人事略云太君爲於潛學博慕畬  
公曾孫女文學載之公長女也吾家舊譜於潛公孫無  
號載之者亦無女適陳氏者然山鶴先生溯其母氏所  
自出不當有誤而先世相傳未聞有錢太恭人爲於潛  
公曾孫女之說亦一疑也近日味根讀府志介亭先生  
傳云康熙壬子副榜府志蓋本於海鹽續圖經我家向  
來數科第從未及介亭先生卽府志續圖經選舉門中  
亦未有介亭先生名傳中之言未知所從來又續澈浦  
詩話錄紫雲先生送子北上詩乃送子大弟詩也吳耘



廬不知予大之爲字而一時失檢恐遂爲後人所疑一人一家之事而岐誤若此況其大者哉讀書豈易言哉  
丙戌七月初三日

弟因查對所刻世系於八月十六日下鄉二十七日歸是役也於宗族所居若中錢南錢孟家堰甘柯頭沈蕩蓀莊東彭城唐家浜齊家橋祠堂頭高地上二灣兜下扇法華橋海鹽縣城無不到也又偕春霆兄至澈上信宿於湖天海月樓先墓之在山中者無不拜也偷閒半日登鷹窠頂觀明神宗時藏經至海濱觀煎鹽實荷天地祖宗生成之德得有此寬閒歲月以步武於先人晨

夕游歷之所更得接訪先世遺墨有出於吾兄見聞所

未及者不敢自私謹以詳告於海鹽湘帆叔處見蓬州

公鄉試墨卷有記一文衡山壽東翁公詩薛方山壽夏

孺人詩真蹟鶴庵府君畫松一軸文端公詩札冊詩爲

歲所作惜失去數葉僅存二首弟十年來訪求集中未收之詩尙存數首日內當同集外文鈔寄少宗

伯公尺牘一卷皆真蹟也又借得擊轅草半榻遺草許

閒堂詩選柳花詠塞上草蕉隱篇刻本偶莊先生廢莪

山房詩文稿手寫本前有自序合選生平所作瓦溪陂

語且處吟西泠游草似厂隨筆論孟題詩鴛渚寓言且

處續吟草花絕句偶莊集燈謎詩龍溪偶和詩甲後編

和讀史詩括蒼初游草再游草息影軒稿共二十卷又  
雜文四卷正德戊辰嘉靖壬辰乙未戊戌四科會試同  
年齒錄鈔本於齊家橋七兄處得撫松居詩集刻本益  
翁觀察公手寫文稿皆官黔時所作警庵先生頤貞堂  
詩十三首魚山先生鷗波中語三十四首合前所得吟  
簫偶存可得  
三以上各種吾兄所未見者有幾偶莊益翁兩公文擬  
鈔數首奉寄編入文匯詩則太繁不能全鈔選鈔又極  
不易也  
丙戌九月十七日

今日初雪甚寒刻已晴獨坐無事細讀八月中來札以  
次奉答文匯補遺目錄內紫芝府君直風會約未曾刊

入文氏德翼雍頌先生淡音序已鈔得奉寄文端公集  
外詩文年內必當錄去寫手不易得零星彙鈔必須請  
人在家方可措手實難發鈔也文匯中文弟所未見者  
不少安慶府君詩文南中竟無副本必須一鈔贈侍講  
公有賀我父四十壽詩五言古一首尊處所輯稿如無  
此篇當錄寄遺集名目吾兄已思得未先世師友述何  
日得讀屠赤水集弟亦曾見之雜刻數種非全稿也巖  
谷之號譜中無之烈婦五妹爲若庵先生支下號旣永  
諱壽隆女文端公姪女也十餘年來接羅先世詩文翰  
墨所見似已得八九必須及早輯成一書初擬仿譜錄

書畫諸書若清河書畫舫體例爲清芬錄若就所見彙鈔亦可成十餘卷然必須掇其精英方可傳後且書畫一門未足見吾先世之全也近欲仿萬柳溪邊舊話及桐陰舊話例爲秦溪舊話桐陰舊話未得見萬柳所述時參神怪其書亦非全帙猶可傳之至今若吾家舊話成必可與韓氏尤氏並傳無疑苦無簡雅之筆又不善裁擇奈何奈何體例必求吾兄酌定弟意先世嘉言懿行詩古文詞書畫居處仕宦之卓然可垂於後者皆可入舊話中或分門類或以人爲主若述臨江公事如守旴眈創立峽江縣述太常公事如直諫奉使禦倭均糧

等事採傳誌文以立綱而以集中文字節錄於下則體

例似日下舊聞

竟仿日下舊聞名秦溪舊聞何如

然集中詩文及所傳

書畫遺墨有必須採入舊話而無傳誌文可以立綱者若自作數語而先人文字轉低一格或作雙行夾注又屬不敬兄以爲宜若何而可大約總以簡實爲主簡則使人不厭實則於己無愧而事有宜詳者若均糧等事有關於一郡掌故者不可不備述始末前纂年譜中採日知錄一條似有微詞吾兄謂此語宜存與否文端公論僞稿事袁簡齋文僅數語可採否公以頌不忌規上結

主知此事其一端也其始末有可揆采否

御製詩文宜列卷首如何敬錄之法求酌之曾擬纂一

集曰陳太夫人畫錄敬錄

御題花卉冊及四子講德圖而以家藏及所見畫幅若

紡餘閒課冊等類有文可錄者附列於後狀誌及他文

字有述太夫人遺事者若少宗伯公蒯氏妹畫冊跋等

類亦爲一卷張浦山徵君撰其妻蔡孺人行略云孺人

姪孫女倩庚幼學於贈公贈公夫人太夫人陳與庚先

王母爲中表姑姪行以戚屬故憐庚孤貧視爲子又以

姪孫女知孺人性恭慎遂爲庚聘焉踰年婚於錢氏南

樓太夫人知人見謂庚曰汝婦賢必能事汝母雖然

語云教婦初來汝當以汝母苦節告之庚受命見強恕

齋文鈔此亦太夫人言行之一則也與南野堂筆記述

廉江府君佚事可以並傳去年從夢廬丈處借得石渠寶笈初輯本有陳某畫四種其本較四庫目尙少六卷此六卷中或尙有陳某畫

仁宗朝續輯之本或可敬錄則石渠寶笈亦可彙鈔一卷

高宗純皇帝

仁宗睿皇帝御題有見於

賜藏畫冊石渠寶笈者有僅見

御集者宜如何敬錄

賜題夜紡授經圖敬錄



御題後附各家題詠可否今所述畫錄亦將輯入舊話  
中兄以爲若何而始詳簡得宜自文端公以來種種榮  
遇必宜備述主文之事擬彙鈔一卷如江西試院桂及  
秦關聯騎黔江並棹圖詩鈔數首少司寇公主試江南  
文端公奉

命遊攝山詩亦擬錄入所得士有可記者若江西丁卯

蔣心畬先生

忠雅堂集  
亦有可鈔

乙丑會試鼎甲會元俱登八座

錢文敏茶山集有可鈔者亦擬鈔入王莊蔣諸公未知  
有集否兄以爲其體宜若何學使則若文端公題帳詩  
及學士公遺事皆宜輯入若專輯一種曰錢氏使車錄

自太常公使楚使粵以及文端公使陝西皆敬錄遺事  
及詩文亦可成數卷可傳之書

曰使車錄則會試與  
順天鄉試不能該

今

亦擬縮入舊話中兄以爲其體宜若何暇望詳定體例  
日積月累期以五年而成於教家型俗大有裨益昨與  
恬齋談及我家近事弟以爲此時原是我家極盛之時  
然如大廳大屋黑漆棟梁光采煥發無奈暗中爲白蟻  
所蝕日久不整理遇大風雪恐有傾壓之患吾儕不能  
支撐門戶惟是時思先人如何忠厚勤儉如何力貧讀  
書如何持躬式訓以爲久遠之計思之述之以傳示後  
之人則我先人遺澤尚可支持數百年乎每與大兄三

兄談亦必及此兄必韙吾言也程甥何日出京完嫻吾

兄極窘之時乃爲添備物件大姊一子一女婚嫁粗了

吾兄皆有力焉不獨大姊默感也

丙戌月 初三初四  
兩日中拉雜寫此

特齋師舟行卅月繪墓圖極精惜未能刻向傳紫芝府

君南園墓卽藥圃故址頃讀介石先生浴展墓詩化城

祖墓云近圃藥分苗注墓南卽先大父藥圃故址則藥

圃當在化城兩涯府君塋南南園非藥圃矣若庵先生

撫松居士自傳云築室宋湖因先君子藥圃舊址遂營

生壙於右若庵先生墓在顧家浜南園墓非藥圃益信

然顧公簡撰行狀杜公士全撰墓誌皆謂墓卽藥圃舊

址顧公爲親串至好當時游讌所及其言似可徵信竊  
意紫芝府君始於宋坡湖築別業曰藥圃後自營壽藏  
亦名之曰藥圃亦未可知兄以爲然否 丁亥正月

春雨市月蕭齋冷況可掬忽接手札及新詩快讀數過  
如披雲霧矣文匯補錄各體詩妙極弟無能爲役適有  
陳敬齋茂才之便帶去半榻遺草擊轅草撫松居集吟  
簫偶存 魚山先生 各一冊半完圃頤貞堂 警庵先生 鷗

波中語

魚山先生

三種合一冊廢莪山房文一冊

詩甚多未

及鈔當再訪  
之湘帆叔

益翁文稿一冊此弟十餘年來所搜羅而

得者似是吾兄所未見弟處亦未有副本選錄後仍須

寄還尙有蘿幄詩存七卷是手寫本未有副墨然吾兄  
有選錄之志此冊必有神物呵護亦交陳君帶去他日  
須還香巖兄也又雜鈔詩十四紙亦附陳便寄去望將  
尊處所已有者鈔一目來及須搜羅各種示知或有助  
於萬一也文端公少宗伯公詩選錄之目卽望寄知弟  
欲鈔讀詩文一道夢寐二十年茫無門徑今以病廢無  
志應舉欲於此中一探消息而用心雜亂根本未立知  
無成矣家有賢師不能自力實屬可惜以是不敢竟爾  
棄置入春來溫易經點後漢書身心總覺浮雜不能爲  
深沈之思如何如何清芬錄有一小跋呈覽新修家譜

大段雖無荒謬而體例雜出誤字不少此事實爲終身抱愧可見心粗氣浮一事不可爲有負長者委任無以自贖今亦託陳君帶去一部乞檢入吾兄得便南下弟獲面承指教數年卽不能有所成就亦可爲教子弟張本無如生計蕭然不敢奉勸遂初未知吾兄弟暨大兄三兄何日得團聚一室耶前日在梅會里遇畫直廬問寢圖王君之姪年七十餘矣屬畫大兄及弟小照合一幅雖畫成不知誰何之人然我兄弟愛敬之意似可傳示後人兄題一詩爲妙他日得我兄弟四人同畫一幅以傳示後人亦可以敦薄夫也然弟與大兄近在百里

尙不能常聚況數千里數百里耶

辛卯

月初九日

刻下延一楷書手擬彙集先世文字遵吾兄所定遺民錄例錄爲一編以了二十年來揆採之事若此事畢後則擬用此例錄海昌文字食祿於此亦宜稍爲酬答未知能成與否

甲午二月十九日寄粵東

近於容光姪處得先世詩文一冊有商隱先生動筆處

紫芝府君藥圃灌花銘壽門橋放生臺如來泉銘

此兩篇皆

參佛乘古來詩文大家亦多及古今體詩十餘首皆夙

如此集中皆存似不必禪也

所未見

秦南公詩弟擬謹錄魯南府君以下四世著述

爲一集

吾兄曾有錄本暇示一目彼此可互補也

而附以大興公之詩文近

日手自鈔寫長夏當告成吾家著述稿本多萃於吾兄

弟處味根亦得十之二三文匯已成巨觀矣

三兄及恬齋宜補入

所選之詩有定本未弟所纂清芬錄雖編次未能盡善  
亦考吾家文翰者所不可無之書秦溪淵源錄尙未有  
清本倘竭數年之力得有成就擬寫幾部存顯忠祠及  
南山丙舍或可支持百十年文匯恐亦未能付梓大梁  
倘有楷書手謄一副本畱之祠屋何如吾兄前寫示二  
曲學髓頗以爲養痾之助然胸中愴怳幾無把握處昨  
閱全謝山窻石文述二曲論學以悔過自新爲宗旨以  
靜坐觀心爲入手靜坐乃能知過知過乃能悔過悔過



乃能改過以自新得此數語如游騎有歸矣快甚快甚  
近日更有大可喜者理合奉告以博吾兄一快前從雲  
泉沈丈處鈔廉江府君詩吾兄屬查唱和諸公有年矣  
上冢時於中錢怡永堂得月洲先生所鈔盛匏庵先生  
竹林唱和詩乃知先公之詩皆在竹林唱和也同時諸  
公姓名略見於中又於曹種水詞稿見李奇峰畫扇乃  
求之畫徵錄於是諸公姓名略可考定矣 李奇峰名琪  
枝錄畫徵仲改庵名宏道詩繫張心齋名瑛沈寓廡名鵬  
宜山府志徒有宜山陸蘊渠號東邨黃非郝名振超陳半  
外紀見府志經籍陸蘊渠名園卓  
村名廷熹陸拜石名廷模會嘉兄孫桂森頗知寶愛

先世翰墨揆得月洲雜著及衡臯碧雲詞板又有合荆

園記亦月洲先生作皆前所未見也

丙申三月二十七日寄大梁

紫芝府君詩三十首弟所謹錄者舊稿尙有數首似是  
適意酬應非先公意所欲存也文四篇乃向所未見者  
謹奉覽吾兄弟求先世遺著所得不爲不多吾兄旣收  
入文匯詩匯輔以弟所鈔清芬錄亦可得四百年著述  
之大概惜皆未能付梓弟意吾兄暇時或就文匯詩匯  
約鈔最精者節兩人脩脯所入刻以問世亦不枉數十  
年心力若此事欲俟之子弟甚難甚難魯南府君以下  
四世遺著弟擬編一冊曰諫草堂

或竟稱承啟堂

四世遺稿吾

兄以爲何如紫芝府君清士詩必須編入而傳鈔沿誤之處尙應商酌兄所錄贈侍講公學士公詩文望屬姪輩鈔一冊見寄戶部公詩文鈔一目可矣學翁處可鈔也

丙申七夕後一日

昨於查笠翁堂弟槎海翁處見商隱先生手評四子合編一冊乃會稽章同

先君諱

紹陽海鹽何鉉晉明與吾

家若庵先生商隱先生論堪輿之言也

專論平洋而無山地可見

先世筆墨外閒時有流傳爲吾兄弟所未經寓目者不少章何兩君名字兄曾知之否

丁酉四月二十一日

廬江詩匯早成爲妙弟前年從中錢得商隱先生摘鈔

之冊今錄數種又近從沈小湖侍郎假得竹林唱和詩  
文園先生詩亦有三十餘首特鈔寄又弟謹跋廉江府  
君遺詩一則求改定遺詩前已錄去今又於辦香庵唱  
和得三首此次所鈔不少明春再寄四子合編有人鈔  
得一冊借來奉寄閱後遇便寄還爲禱幸承先世餘緒  
得稍通文墨則祖宗嘉言懿行待傳於後者必當努力  
接輯以垂示子孫否則名滿天下亦屬何補弟奉吾兄  
之教自弱冠迄今所遇零篇斷簡謹藏篋笥清芬世守  
錄雖已定卷帙而尙須增減前輯族譜謬誤百出擬彙  
鈔傳誌諸文爲秦溪淵源錄以備他日參考以稍贖前

愆亦未能鈔成一則目昏氣痞不能手鈔兒輩欲其專  
心舉業又未能并力謄寫一則文字之去取必須審定  
繁縟處亦宜刪節非淺見所能權衡也來札謂人事如  
棋人生若夢當爲之事宜速爲讀之實發猛省遵諭讀  
論語及朱子語類倘有數年之力則義理稍明於撰集  
文字自易奏功矣 丁酉十二月十六日

汴梁發水傳聞藉藉考之明史大梁屢受河決之患其  
勢皆甚熾益令魂夢難安十九日晨起以神蓍筮之得  
履卦六爻不變應占彖詞程傳謂至順至當雖履虎尾  
亦不見傷害此心稍寬數日來傳聞益甚昨接友人杭

州札子仁亦以沈維宜吳門札寄閬謂城內高處無水  
低者不過一二尺撫署及大梁彝山兩書院均無水則  
尊處確實平安不勝欣慰想旬日必有安信遞到矣東  
坡書合浦舟行云所撰易書論語皆以自隨世未有本  
撫之而嘆曰天未喪斯文吾輩必濟已而果然弟昨述  
此以語兒輩云我先人遺墨之至精者皆在大梁吾兄  
所撰集廬江文匯詩匯年譜

國朝碑傳集晉會要三國會要

皇輿圖說皆未有副本波臣不應攘取況安慶府君遺  
澤在中州吾兄安硯於此亦當有神物呵護兒等聞此

言鼯睡如叔黨弟則筮得天澤之卦後心稍稍定及閱  
蘇杭兩信飲食乃覺有味自此當校讀史記如常履之  
九二爻辭弟之小名實取於此上九考祥元吉吾兄當  
之无疚也廿一日晨起書此

辛丑七月

昨日思路忽開擬編頤和室合稿第一卷先大夫遺著  
第二卷先宜人遺詩第三卷四水子遺言第四卷以後  
則甘泉鄉人詩文雜著兄及弟往還之札亦擬編入約  
可共得二十餘卷兄以爲何如尊齋所藏先大夫手札  
前曾乞得數通節鈔入稿尙望鈔寄所存者是所至禱  
音容日遠幸存數行遺墨俾子孫想見教家訓俗之道

原不必與古今作者角短長自成一家規矩可矣倘能  
集資亦欲付梓吾兄能南來細爲訂定大妙大妙暇望  
爲作序文不勝盼禱

壬寅二月廿八日

家集以次付梓妙極五百年之譜果能鈔寄否弟於先  
世舊事既未能會萃海昌文集之選又恐識力未逮校  
勘三史已逾十年亦未有定本愧爲吾兄之弟如何如  
何近日略讀朱子全書覺平日所爲無一爲己之學獨  
坐靜思彌增悔恨願兄教以切己體察之方或不至終  
身驚外幸甚幸甚

壬寅九月廿一日

五月中編寫合稿四卷先考妣及四水子遺著可見大



略吾兄寄祝女事札及書湯狷庵詩皆已附入現節兩  
季俸銀授梓秋初或有樣本急於告成不及請定實緣  
我家適當厄運冷齋之能守與否亦不可知所以急急  
了此不肖之責耳若區區淺近之言則聽其存亡可矣  
承寄示改定弟文稿序較前更簡括然終不免有過譽  
處所最不敢當而益增隱痛者孝子二字也能去此則  
他或庶幾勉勵以副萬一寄先人手札兩通已拜領遺  
稿中不及刻畱示子孫敬讀之墨菊詩及漱上讀書圖  
詩清芬錄中皆有之清芬錄爲常都轉取閱擢皖臬大  
約秋冬乃  
行弟閏月中送試到杭當索歸兒輩鄉試後卽錄寄不

誤墨菊卷似在味根處澈上圖則慎宜所藏也先大夫  
任甌甯時吳澹川有贈詩見南野堂筆記中當訪得全  
集鈔奉芝城唱和之冊已失之邸舍分韻詩不知雙橋  
稿中存否餘亦不可得宛平明府常州胡公名遜有先  
大夫輓詩極親切小時不知寶貴未及鈔存胡公若有  
稿當訪問毘陵人或可得也 癸卯七月廿八日

連接冬底來諭諄諄爲後生小子立讀書根本弟細爲  
兒輩開導并鈔一通寄子仁屬其傳誦講解卽不能一  
一領受必有聞而憤悔不自惰棄者但目前殊難其人  
耳弟已無科舉之累亦尙未能潛心義理總由文字之

障未除也舉業代聖賢立言果能實力奉行較他文字  
尤易近道兒輩究是根本未立所以理路不清專咎墨  
卷墨卷豈任咎哉現且令理經能熟讀正文後各就性  
之所近稍立牆壁不失爲讀書種子足矣科舉得失弟  
已淡焉置之不敢奢望喫有菜飯著可補衣爲童子師  
先人餘澤或未歇絕也

甲辰三月

十弟出塞非夢想所及筱珊尙不知如何家運乖舛一  
至於此兄言清安老人辦案細微而又疎闊確得老人  
之用心弟在山東撫署侍談時亦窺見一二嘗於燭下  
閱幕友所擬奏稿往往如廬陵之言一日定某縣教官

獄其罪名無祿人當流三千里職官應出口老人執筆  
沈思久之曰若年已老其爲祿甚微況口舌細故固執  
不通致以誣人罪名反坐出口尙能生還耶仍以流三  
千里定罪可也若此者非一端弟所及見五叔祖六叔  
祖世父良齋公叔父恕堂公益齋公皆宅心和厚恕堂  
公之敬養五六叔祖禮意備至及罷廬州守兩房諸從  
遂失所依賴諸老人遺言遺事多有可述者每欲就所  
聞見與先大夫之事類記之以爲居官居家之法苦無  
文筆未能成聞兄細微而又疎闊之言不獨辦案如是  
讀書爲人亦皆如是蓋四字互爲體用其益無方矣合

稿現在脩改常南陔廉訪贈序一首情意甚厚不能不  
刻已付梓吾兄有更定之處卽示知當脩改刷印也甲辰  
七月廿六日

五月於吳山書肆見京師坊閒排字本

皇清奏議六十八卷自署仁和琴川居士編其第五十  
二卷有伯祖少司寇公酌籌農忙停訟例借鈔奉寄不  
知吾兄已編入文匯否又前從李金澗處見其大父敬  
堂先生手錄乾隆三十一年七月二十一日九卿議覆  
刑部左侍郎錢某某奏擅殺罪人律具載少司寇公原  
奏鈔存篋中二十餘年矣不知兄曾見之否 乙巳六

月

吾家文字又值發祥之時此後仕學各立本根各成局面則在諸子弟之善讀先世遺書善守先人家法矣吾兄及弟廩廩數十年幸見子孫次第掇取科名兄之所成就者可以息肩矣弟則尙茫然不自知其何以爲子弟法也如何如何二十年來父子燈下講論誦讀之日卻亦不少兒曹功名若遂則此樂渺不可得矣若云財用足則百志成談何容易苟非義之財亦何足以敬宗收族耶所鈔濟美錄中有考官及評語者僅有嘉靖乙酉鄉試及壬辰會試卽所藏臨江公鄉試卷刻本得之

敦甫叔者亦無之蓬州公明神宗四年鄉試場卷二十  
年前見於敦甫叔處則考官評語皆是場中真本弟曾  
詳記之似曾錄稿奉寄不知存篋中否倘檢尋不得卽  
示知錄奉文頗繁冗急於寄信不及寫矣

乙巳九月初

六日

子萬傳言吾兄謝絕乞文者此後不得以無益之文相  
溷惟是四水子之葬也渴與弟妹諸殤同冢且與四姊  
八妹之生母同壤今已將五十年不可遷矣弟思所以  
殊異之且刻數行於墓道前文筆不足以達心殊耿耿  
望吾兄暇時作一文想必許也

丙午五月

樂壽老人命元孫說學山兄家傳均已細讀弟時與炳  
森應溥言伯伯近日之文愈平淡愈不可及卽如學翁  
家傳我胸中所欲言者亦如是而思之數年未能成篇  
今得此篇學翁可慰矣雲壽兄文字亦望卽成爲要  
己酉四月十一日

兩月來點讀衛氏禮記集說日十餘葉杭堇浦惟稱陸  
農師能與前人抗論弟則謂畢竟以長樂陳氏爲首推  
也衛氏節錄孔疏閒有失其本意者吾兄以爲何如所  
藏日知錄猶是學源先生遺書近假李香子翁過錄敬  
堂先生評點本令炳森依式錄之曾聞介石徵君述敬



堂遺言謂近人得古人一瑕輒自喜如酷吏之得一盜賊也盡力攻駁與盡法敲榜何異嘗歎服以爲名言今觀敬翁所評亦不免是病而於宋大儒時有不滿因令炳森凡涉此類悉置不錄庶幾不負敬翁平日之言且不失學源先生讀書宗旨耳陳其年全集炳森之友所贈頃讀儲夫人傳似尙有繁縟處不及陳恭人誌遠矣吾兄本原深厚非近代文家所能逮亦猶蘅翁之於詩也前聞靜讀時常在顧諟天之明命句近更何如弟則本體之明幾何息矣聞炳森之子讀大學偶憶及此然爲救荒計苦無理財之策而以利爲利者日接於耳目

殊堪慨嘆

己酉六月廿九日

子壽同居記及學源先生墓表細讀數過子壽平生大略已具雲壽兄亦得見於此文妙極弟所最愛讀者記賣漿者事與此文相輔而行大妙大妙學源先生同冢二兄外尙有三姊蓋同以丁巳秋沒於吳橋二兄三姊先妣所最鍾愛以是數十年來歲時必附祭於學源先生不獨祭墓爲然也弟主之則此禮不改他日炳森能自立門戶則祭學源先生而附兩殤義所不可當酌行之耳大作所定墓祭之禮實足補變禮之一則弟年來讀禮記略能窺測到此而不能言也得吾兄議定炳森

應溥兄弟可遵行矣手札云管教幼孩全賴內裏有人  
真是至言弟若非先妣管教之嚴豈免下流居家十年  
雖宗黨稍有資助而千萬辛苦抱病支持曾食半菽以  
度凶歲此日念之猶覺傷心以繹之目前家計若好爲  
之猶可自立來信付看後當能感動也

庚戌四月四日

此信兄不及見大梁屬續之日距余作信時僅三  
日耳海昌得惡耗則五月九日也傷哉泰吉識

余受教於衍石兄四十餘年統計相聚之日不及三  
年凡脩身讀書之方詩文之矩矱及傳述先世遺訓  
以爲法守者多在書問中我兄弟書問初未有稿兄  
手札余謹藏篋中刻記事稿時錄寄粵東因存四首

後兄亦整理余手札命子增姪錄寄余擬合梓兄弟  
往還書問以示家之子弟力未能也今編拙稿外孫  
沈師濟摘存二十餘通謂不獨錢氏子弟所當體會  
也嗚呼自歲庚戌四月吾兄下世後每有論著請益  
無從余亦衰老於經史之學無所成就負兄多矣然  
余自少至老承吾兄之教謹守先世詩書之澤不敢  
妄言妄動以失家規兢兢微尙未嘗一日有閒也存  
此以質有道君子尙其鑒諸咸豐甲寅正月旣望廿  
泉鄉人手識

州廣文錢警石先生爲我大母太安人族叔祖而從

學於我舅祖特齋先生以故早歲卽與吾祖遊及官海昌後舅祖寓吾齋有年先生過家上冢必來訪我父亦得其談讌光煇六七齡卽侍聞緒論迨稍長摳衣請謁先生誨之無倦容嘗聞之舅祖曰先生少卽受詩古文法於從兄衍石給諫力學砥行族黨交譽之一時有錢氏二石之稱及光煇侍談時請問詩古文法先生亦必述給諫之論議以爲宗主也給諫次孫元之君娶於沈我姑之子也以是光煇時得見給諫與先生往還之書大都談文字商從違剖析義理根柢乎經史稟承乎祖父之訓雖家常瑣屑語皆足

以昭世範垂家誠又嘗於從舅祖味根明府所得見  
文端公與擇翁少宗伯公往還書及少宗伯公家書  
之冊益知先生家法所自來竊歎一門之中傳授淵  
源實大且遠非尋常師友之所能及矣今先生編梓  
文稿光煇幸以累世戚好之故得與校字因記所聞  
見於與給諫述家世文字書後給諫與先生書及先  
生未入稿之書他日當編爲一集以傳於世蓋不獨  
錢氏一家之言也光煇見先生與我舅祖共談時舅  
祖以族祖待先生先生則執弟子禮惟謹亦可法者  
敬附誌之咸豐甲寅二月朔蔣光煇謹識

甘泉鄉人稿卷二